



## Gorchmynion Amddiffyn rhag Priodas dan Orfod

Sut y gallant fy amddiffyn?

### Sut y gallant fy amddiffyn?

Mae'r ffurflen hon yn disgrifio sut y gall Gorchymyn Amddiffyn rhag Priodas dan Orfod eich cynorthwyo os ydych yn cael eich gorfodi i briodi neu eich bod mewn priodas dan orfod. Mae'n esbonio pwy gaiff wneud cais am orchymyn, ac mae'n disgrifio'r hyn mae'n rhaid i chi ei wneud a beth fydd yn digwydd unwaith y bydd y llys yn derbyn eich cais.

### Beth yw priodas dan orfod?

Priodas dan orfod yw priodas sy'n digwydd heb ganiatâd llawn a rhydd y ddau barti. Gall gorfodaeth gynnwys gorfodaeth gorfforol, yn ogystal â phwysau emosiynol, cael eich bygwth neu fod yn ddioddefwr camdriniaeth seicolegol. Nid yw priodas dan orfod yr un fath â phriodas wedi ei threfnu. Mewn priodas wedi ei threfnu, mae'r teuluoedd yn cymryd yr awenau wrth ddewis partner i briodi, ond mae gan y cwpl y rhyddid a'r dewis i dderbyn neu wrthod y trefniant.

### Sut gall y Gorchymyn Amddiffyn rhag Priodas dan Orfod fy helpu i?

Gall y Gorchymyn Amddiffyn rhag Priodas dan Orfod eich helpu os ydych chi yn:

- yn cael eich gorfodi i briodi; neu
- mewn priodas dan orfod eisoes.

Mae Gorchymyn Amddiffyn rhag Priodas dan Orfod yn unigryw i bob achos ac mae'n cynnwys amodau sy'n rhwymo mewn cyfraith a chyfarwyddiadau sy'n newid ymddygiad unigolyn neu unigolion sy'n ceisio gorfodi rhywun i briodi. Bwriad y gorchymyn yw amddiffyn yr unigolion sydd wedi, neu yn cael eu gorfodi i briodi. Gall y llys wneud gorchymyn ar frys fel bod y camau amddiffyn mewn lle ar unwaith.

Gall y llys:

- Wneud Gorchymyn Amddiffyn rhag Priodas dan Orfod i amddiffyn unigolyn sy'n wynebu priodas dan orfod neu sydd wedi cael eu gorfodi i briodi

Gellir gwneud ceisiadau am orchmynion amddiffyn rhag priodas dan orfod ar yr un pryd ag ymchwiliad heddlu neu achosion troseddol eraill. Gellir anfon rhywun nad yw'n ufuddhau i orchymyn llys i garchar am hyd at ddwy flynedd am ddirmyg llys; ond mae torri amodau Gorchymyn Priodas dan Orfod hefyd yn drosedd sydd â dedfryd uchaf o bum mlynedd yn y carchar.

## **Ym mhle gaf i wneud cais am orchymyn?**

Gellir gwneud cais am Orchymyn Amddiffyn rhag Priodas dan Orfod yn y Llys Teulu, sy'n gwasanaethu Cymru a Lloegr. Gallwch wneud y ceisiadau hyn mewn nifer o ganolfannau llys. Darperir rhestr o ganolfannau llys sy'n delio â'r mathau hyn o geisiadau ar ddiwedd y daflen hon.

## **Pwy all wneud cais am orchymyn?**

- Yr unigolyn sydd i'w amddiffyn gan y gorchymyn
- Trydydd parti perthnasol
- Unrhyw unigolyn arall gyda chaniatâd y llys.

Trydydd Parti Perthnasol yw rhywun a benodwyd gan yr Arglwydd Ganghellor i wneud ceisiadau ar ran pobl eraill.

Gall oedolion neu blant (dan 18 oed) wneud cais am Orchymyn Amddiffyn rhag Priodas dan Orfod. Gall plant gael 'cyfaill agosaf' neu rywun i'w cynorthwyo, ond nid oes rhaid iddynt, os oes ganddynt gynrychiolydd cyfreithiol neu bod y llys yn cytuno.

## **Os ydych yn pryderu am ddod i'r llys**

Ysgrifennwch eich pryderon ar eich ffurflen gais neu gwnewch gais ysgrifenedig i Reolwr Cyflawni'r Llys cyn gynted â phosib, neu efallai bydd oedi wrth wrando ar y cais.

Efallai bydd y llys yn gallu cynnig:

- Mannau aros ar wahân yn y llys
- Drysau ar wahân i fynd i mewn ac allan o'r llys
- Parcio ar dir y llys i hwyluso mynediad rhwydd i adeilad y llys ar gyfer tystion dan fygythiad.

Efallai bydd cyfleusterau amddiffyn tystion ar gael mewn rhai llysoedd.

## Os ydych yn pryderu am roi tystiolaeth yn yr ystafell llys

- Dywedwch wrth y llys beth yw eich pryderon ar eich ffurflen gais. Bydd y llys yn penderfynu beth sy'n briodol a gall orchymyn :
- Sgriniau i sicrhau na all tystion weld yr atebwyr yn y llys (yn y math hwn o achos yr atebwyr yw'r unigolyn neu unigolion yr honnir eu bod yn ceisio gorfodi rhywun i briodi) - rhoddir y sgriniau o amgylch y blwch tystion yn y llys fel na all y tystion weld yr atebwyr, a ni all yr atebwyr weld y tystion tra byddant yn rhoi tystiolaeth.
- Tystiolaeth fideo wedi'i recordio – Mae hyn yn caniatáu i gyfweiliad gyda'r tystion, sydd wedi cael ei recordio cyn y gwrandawriad, gael ei ddangos fel prif dystiolaeth y tyst yn ystod y gwrandawriad h.y. nid oes rhaid i'r tyst ddweud beth sydd wedi cael ei ddweud yn barod, ond mae'n rhaid iddynt fod ar gael i'w croesholi os bydd angen.
- Cyswllt fideo / teledu byw, yn caniatáu i dystion roi tystiolaeth o du allan i'r ystafell llys – mae hyn yn caniatáu i'r tyst roi tystiolaeth drwy gyswllt teledu o ystafell arall yn yr adeilad llys, neu o adeilad arall yn gyfan gwbl. Er nad yw'r tyst yn dod i mewn i'r ystafell llys, mae'r rhai hynny sy'n bresennol yn y llys yn gweld y tyst yn rhoi tystiolaeth ar y monitor teledu.

Y llys sydd i benderfynu beth sy'n briodol, os oes unrhyw beth, ym mhob achos.

Efallai gall y llys ddarparu'r cyfleusterau ychwanegol hyn:

- Os oes gennych anabledd ac mae angen cymorth neu gyfleusterau arbennig arnoch, cysylltwch â'r llys i gael gwybod pa help sydd ar gael. Darperir rhestr o ganolfannau llys a rhifau ffôn ar ddiwedd y daflen hon.
- Os byddwch angen cyfieithydd oherwydd nad ydych yn siarad Saesneg, bydd angen i chi roi gwybod i'r llys fel y gellir trefnu un, gan nodi'r iaith a'r dafodiaith.

## Faint fydd y gost?

Nid oes ffi llys am wneud cais am Orchymyn Amddiffyn rhag Priodas dan Orfod i chi'ch hun neu i rywun arall. Yn yr un modd, nid oes ffi llys am unrhyw drefniadau llys ychwanegol sy'n gysylltiedig â'ch achos, megis:

- ceisiadau i amrywio neu derfynu gorchymyn
- ceisiadau i'r Llys Teulu ystyried sut y dylid delio â'r unigolyn sydd wedi torri amodau'r gorchymyn
- cais i feili llys gyflwyno'r gorchymyn

## Alla'i gael cymorth cyfreithiol?

Gallwch. Mae cymorth cyfreithiol ar gael ar gyfer ceisiadau am Orchmynion Amddiffyn rhag Priodas dan Orfod a thraddodebau am dorri amodau gorchymyn. Gall gyfreithiwr, neu aelod o ganolfan y gyfraith neu Ganolfan Cyngor ar Bopeth eich cyngori ynghylch a oes gennych achos rhesymol. Gellir cael rhagor o wybodaeth am gymorth cyfreithiol a sut i ganfod cynghorydd cyfreithiol naill ai ar-lein yn [www.gov.uk/legal-aid](http://www.gov.uk/legal-aid) neu drwy ffonio 0845 345 4345 (Llun i Gwener, 9am - 6.30pm)

## Alla'i wneud cais am Orchymyn Amddiffyn rhag Priodas dan Orfod?

Gallwch, neu gallwch ofyn i gyfreithiwr wneud hyn ar eich rhan. Os ydych yn gwneud cais eich hun, mae'n rhaid i chi fod yn barod i lenwi'r ffurflenni a'r datganiadau perthnasol, ac egluro eich achos i'r llys.

Os bydd angen help arnoch i lenwi'r ffurflenni hyn, ac os nad ydych chi'n adnabod ffrind neu berthynas a allai helpu, dylech fynd i weld cyfreithiwr neu Ganolfan Cyngor ar Bopeth. Gall staff y Llys helpu drwy egluro gweithdrefnau'r llys, ond ni allant ddarparu cyngor cyfreithiol ar deilyngdod achosion unigol, na rhoi cyngor am y canlyniad posibl.

## Pa ffurflenni y bydd arnaf eu hangen?

- Bydd arnoch angen ffurflen gais **Gorchymyn Amddiffyn rhag Priodas Dan Orfod (ffurflen FL401A)**
- Os bydd arnoch angen caniatâd y llys i wneud cais ar ran rhywun arall, llenwch Ffurflen FL430 Cais am ganiatâd i wneud cais am Orchymyn Amddiffyn rhag Priodas Dan Orfod

Mae'r ffurflenni hyn i gyd yn rhad ac am ddim. Gallwch eu cael o unrhyw un o'r canolfannau llys sy'n delio â cheisiadau am Orchmynion Amddiffyn rhag Priodas dan Orfod (ceir rhestr o'r canolfannau llys hyn ar ddiwedd y daflen hon) neu gallwch lwytho'r ffurflenni o'n gwefan yn [hmctsformfinder.justice.gov.uk](http://hmctsformfinder.justice.gov.uk)

## Gwneud cais am orchymyn amddiffyn rhag priodas dan orfod

Os mai chi yw'r unigolyn sydd i'w amddiffyn gan y gorchymyn neu'r trydydd parti perthnasol (a benodwyd gan yr Arglwydd Ganghellor), dylech lenwi **Ffurflen FL401A Cais am Orchymyn Amddiffyn rhag Priodas dan Orfod**. Cewch ragor o wybodaeth ar sut i lenwi'r ffurflen ar gefn Ffurflen FL401A. Bydd arnoch angen digon o gopiau i'w cyflwyno i'r holl atebwyr a enwir.

- Rhowch fanylion sut ydych chi am i'r llys eich amddiffyn e.e. atal rhag cael eich tywys dramor i briodi dan orfod.

- Rhowch fanylion os defnyddiwyd unrhyw drais neu fygythiadau.
- Llenwch **Ffurflen C8 Cyfeiriad Cyfrinachol** os nad ydych yn dymuno datgelu eich cyfeiriad neu gyfeiriad unrhyw un a nodwyd yn y ffurflen gais i'r atebwyr. Gallwch gael y ffurflen hon o'r canolfannau llys a restrir yn y daflen hon neu oddi ar ein gwefan yn [hmctsformfinder.justice.gov.uk](https://hmctsformfinder.justice.gov.uk)
- Os ydych yn gwneud cais ar ran rhywun sydd i'w hamddiffyn, mae'n rhaid i chi lenwi **ffurflen FL430 Cais am ganiatâd i wneud cais am Orchymyn Amddiffyn rhag Priodas dan Orfod** yn gofyn am ganiatâd y llys i wneud cais am orchymyn.
- Gwneud datganiad ar lw os ydych yn gofyn am i'r cais gael ei wrando heb roi rhybudd i'r atebwyr mewn achosion brys neu mewn argyfwng (gweler isod).

## Beth ddylwn i wneud os oes angen gorchymyn arna'i ar frys?

Cewch ofyn i'r llys ystyried eich cais ar unwaith a gwneud gorchymyn heb gyflwyno unrhyw ddogfennau i'r atebwyr. Gelwir hyn yn orchymyn ex-parte neu orchymyn heb rybudd.

Os bydd y barnwr yn gwneud gorchymyn heb rybudd, fe gewch apwyntiad arall i ddod i'r llys. Bydd gan yr atebwyr hawl i fod yn bresennol yn yr apwyntiad hwn er mwyn i'r barnwr wrando ar bawb cyn penderfynu a ddylai wneud gorchymyn arall ai peidio.

Os ydych yn gwneud cais am orchymyn heb rybudd, rhaid i chi wneud datganiad ar lw. Os ydych yn cynrychioli eich hun, gwnewch ddatganiad ysgrifenedig, gan nodi pam mae arnoch angen cael eich amddiffyn a mynd ag ef i'r llys gyda'ch ffurflen gais FL401A. Yn y llys, dylech ofyn am gael tyngu llw ar y datganiad rydych chi wedi'i gwblhau. Mae hyn yn golygu y gofynnir i chi lofnodi'r datganiad gerbron aelod o staff y llys a chadarnhau ar lw bod yr wybodaeth arno'n wir.

## Beth ddylwn i wneud ar ôl llenwi'r ffurflenni?

- Dylech gyflwyno'r ffurflenni sydd wedi'u llenwi a darparu copïau i'r llys.

## Beth fydd yn digwydd pan roddaf y ffurflenni i'r llys?

- Bydd y llys yn gwneud yn siŵr bod y ffurflenni'n iawn ac yn rhoi Rhybudd o Achos ar gyfer **Gorchymyn Amddiffyn rhag Priodas dan Orfod (FL402A)**, i chi. Bydd yn nodi dyddiad eich apwyntiad gerbron y barnwr.
- Mae er eich budd eich hun i fod yn bresennol ar y dyddiad a nodir ar y ffurflen. Dylech fod yn barod i roi unrhyw dystiolaeth yr ydych yn meddwl a allai eich helpu a rhoi eich ochr chi o'r achos.
- Rhaid cyflwyno'r **ffurflen gais (FL401A)** a'r **rhybudd o achos (FL402A)** i'r atebwyr a'r unigolion eraill. Os yw cyfreithiwr yn eich helpu, anfonir y ffurflenni atynt hwy i'w cyflwyno.

- Gallwch ofyn i'r llys gyflwyno'r dogfennau ar eich rhan. Mae'n bosibl y bydd y llys yn gofyn i chi lenwi ffurflen ar gyfer hyn. Bydd beili'r llys yn codi ffi am gyflwyno. Yna, bydd y llys yn trefnu i'r beili gyflwyno copi o'ch cais a dogfennaeth arall.

## Beth ddylwn i wneud os bydda i'n cyflwyno'r dogfennau fy hun?

Rhaid i chi drefnu i rywun (e.e. cyflwynydd proses) gyflwyno copi o'r ffurflen gais FL401A ynghyd â rhybudd o unrhyw wrandawriad neu apwyntiad cyfarwyddo yn **Ffurflen Rhybudd o Achos FL402A** i'r atebwyr, i'r unigolyn sydd ynghlwm wrth yr achos (os nad yw'n geisydd), ac unrhyw unigolion eraill sy'n cael eu cyfarwyddo gan y llys yn bersonol ddim llai na 2 ddiwrnod cyn y dyddiad y gwrandewir y cais. Fodd bynnag, gall y llys leihau'r cyfnod hwn.

Ar ôl i'r dogfennau gael eu cyflwyno, dylech gwblhau datganiad cyflwyno (Ffurflen FL415) a'i ffeilio yn y llys. Mae Ffurflen FL415 yn nodi pwy gafodd y dogfennau, sut, ym mhle, ac ar ba ddiwrnod ac amser. Gallwch gael y ffurflen hon o unrhyw un o'r canolfannau llys a restrir yn y daflen hon neu gallwch eu lawrlwytho o'n gwefan: [hmctsformfinder.justice.gov.uk](https://hmctsformfinder.justice.gov.uk)

Os na allwch chi ddod o hyd i gyfeiriad y rheiny y mae angen cyflwyno iddynt neu os yw'n ymddangos eu bod yn osgoi'r cyflwyno, cewch ofyn i'r llys gyflwyno'r papurau mewn ffordd arall (er enghraifft, yn y man lle mae'r atebydd yn gweithio).

## Beth fydd yn digwydd yn y gwrandawriad?

Bydd gwrandawriad ar gyfer cais am Orchymyn Amddiffyn rhag Priodas dan Orfod yn cael ei wrando'n breifat (gelwir hyn fel arfer 'yn y siambrau'), oni bai bod y llys yn cyfarwyddo fel arall a bydd cofnod o'r gwrandawriad yn cael ei wneud. Gall y llys ganiatáu i bobl eraill fod yn bresennol yn y llys, er enghraifft, ffrind neu gynghorydd annibynnol, i roi cefnogaeth. Efallai bydd gofyn i geiswyr roi tystiolaeth lafar yn y llys. Bydd hyd y gwrandawriad yn amrywio, yn ddibynnol ar gymhlethdod yr achos ac os yw'r atebwyr yn gwrthwynebu'r honiadau.

Unwaith y bydd y barnwr yn deall safbwynt y ddau barti, gallant benderfynu ar unrhyw un o'r canlynol:

- bod arnynt angen rhagor o wybodaeth amdanoch chi, a'r holl atebwyr. Fe gewch wybod pa wybodaeth ychwanegol i'w darparu.
- bod arnynt angen rhagor o wybodaeth, ond eu bod yn barod i wneud gorchymyn dros dro (interim) nes bod yr holl wybodaeth ychwanegol wedi'i darparu. Fe gewch apwyntiad newydd, gorchymyn dros dro, a gwybod pa wybodaeth ychwanegol i'w darparu.
- eu bod yn barod i wneud gorchymyn am gyfnod penodol, ac y bydd y llys yn ailystyried yr achos ar ôl hynny. Fe gewch ddyddiad apwyntiad newydd a chopi o'r gorchymyn llys.

- eu bod yn barod i wneud gorchymyn. Bydd y gorchymyn yn parhau nes i chi neu'r atebdydd ofyn i'r barnwr ailystyried yr achos. Rhoddir copi o'r gorchymyn i chi.
- peidio â gwneud gorchymyn ond derbyn ymgymeriad gan yr atebwyr ar delerau y cytunwyd arnynt (gweler isod).

## **Beth yw ymgymeriadau'?**

Addewid a wneir i'r llys i wneud, neu i beidio â gwneud, pethau penodol. Mae torri ymgymeriad yn ddirmyg llys a gall ddwyn cosb o garchar am hyd at ddwy flynedd.

## **Beth fydd yn digwydd ar ôl y gwrandawriad?**

Os yw'r llys wedi gwneud Gorchymyn Amddiffyn rhag Priodas Dan Orfod, bydd y ceisydd yn cyflwyno copi o'r gorchymyn ac unrhyw ddogfennau eraill y llys i'r atebwyr, i'r unigolyn sy'n destun i'r achosion (os nad yw'n geisydd), ac unrhyw un arall a enwir yn y gorchymyn yn bersonol cyn gynted ag sy'n rhesymol bosibl. Gallwch ofyn i'r llys gyflwyno'r dogfennau ar eich rhan. (gweler uchod).

Mae'n rhaid i chi gyflwyno'r gorchymyn i'r heddlu ynghyd â datganiad yn nodi bod y gorchymyn wedi'i gyflwyno i'r atebwyr ac unrhyw un arall a gyfarwyddwyd gan y llys neu eu bod wedi cael gwybod am ei delerau. Dylai'r gorchymyn a'r datganiad gael eu danfon i'r orsaf heddlu sy'n gwasanaethu cyfeiriad yr unigolyn a amddiffynnir gan y gorchymyn, oni bai bod y llys yn nodi gorsaf heddlu arall. Gallwch ofyn i'r llys gyflwyno'r dogfennau ar eich rhan. (gweler uchod).

## **Beth os wyf eisiau amrywio, ymestyn neu derfynu'r gorchymyn?**

Gallwch wneud cais i amrywio, ymestyn neu derfynu gorchymyn amddiffyn rhag priodas dan orfod yn ddiweddarach. Bydd angen i chi lenwi Ffurflen **FL403A Cais i amrywio, ymestyn neu derfynu gorchymyn amddiffyn rhag priodas dan orfod**.

## **Beth os na fydd yr atebdydd yn ufuddhau i'r gorchymyn?**

Gellir delio ag achos o dorri amodau gorchymyn amddiffyn rhag priodas dan orfod yn y Llys Teulu neu mewn llys troseddol. Dan adran 63CA Deddf Cyfraith Teulu 1996, a ddaeth i rym ar 16 Mehefin 2014, mae torri amodau gorchymyn yn drosedd sy'n dwyn cosb fwyaf o 5 mlynedd yn y carchar. Mae hyn yn golygu y gall yr heddlu arestio unigolyn sy'n methu ufuddau i orchymyn (neu sy'n 'torri amodau gorchymyn') heb fod angen i'r llys roi pŵer i arestio neu i'r dioddefwr wneud cais i'r Llys Teulu am warant i arestio.

Ar ôl i'r heddlu ymchwilio i'r tor-amod, bydd Gwasanaeth Erlyn y Goron yn penderfynu a ddylid bwrw ymlaen â'r erlyn drwy ddilyn y prawf dau-gam yn y Cod i Erlynwyr y Goron: a oes digon o dystiolaeth i roi posibilrwydd realistig o euogfarn; ac, os felly, a yw erlyn er budd y cyhoedd.

Fodd bynnag, os nad ydych eisiau delio â'r tor-amod drwy ddilyn y llwybr troseddol, neu os bydd Gwasanaeth Erlyn y Goron yn penderfynu peidio ag erlyn, gallwch wneud cais i'r Llys Teulu am warant i arestio. Rhaid i'r cais am warant i arestio gael ei gefnogi gan ddatganiad ar lw yn nodi sut y torrwyd amodau'r gorchymyn neu'r ymgymeriad. Mae'n rhaid gwneud y cais ar Ffurflen **FL407A Gwarant Arestio Gorchmynion Amddiffyn rhag Priodas dan Orfod. Efallai y bydd rhaid talu ffi.**

Pan fydd unigolyn wedi torri neu ddirmygu gorchymyn, bydd y llys yn delio gyda hwy dan ei bwerau o ddirmyg llys, a all gynnwys eu traddodi i garchar am hyd at ddwy flynedd.

Felly, gallwch naill ai ffonio'r heddlu er mwyn delio â'r tor-amod yn y llysoedd troseddol neu gallwch wneud cais i'r Llys Teulu i ddelio â'r tor-amod fel dirmyg llys.

Fodd bynnag, os bydd rhywun yn cael ei ddyfarnu'n euog o'r tor-mod mewn llys troseddol, ni ellir eu cosbi am ddirmyg llys na'r ffordd arall.

## **Os nad ydw i eisiau gwneud cais am orchymyn, alla'i gael rhagor o gymorth?**

Gallwch gysylltu â'r Uned Priodasau Dan Orfod (FMU) ar ei llinell gymorth gyfrinachol 020 7008 0151. Mae FMU yn dîm Swyddfa Dramor a Chymanwlad/Swyddfa Gartref ar y cyd, sy'n darparu cefnogaeth ymarferol a gwybodaeth i bobl sydd mewn perygl o gael eu gorfodi i briodi a'r rhai hynny sydd mewn priodas dan orfod eisoes. Delir â'r holl wybodaeth yn hollol gyfrinachol.



# Rhestr o ganolfannau llys lle gellir gwneud ceisiadau am Orchymyn Amddiffyn rhag Priodas dan Orfod

Y Llys Teulu sy'n delio â cheisiadau am Orchymynion Amddiffyn rhag Priodas dan Orfod. Dylid anfon cais i'r Llys Teulu yn eistedd yn un o'r canolfannau llys isod. Mae'r canolfannau llys hyn fel arfer ar agor o ddydd Llun tan ddydd Gwener rhwng 10am a 4pm.

<b>Central Family Court</b> First Avenue House 42-49 High Holborn Llundain Lloegr WC1V 6NP 020 7947 6000	<b>Bristol Civil Justice Centre</b> Greyfriars Lewins Mead Bryste Lloegr BS1 2NR 0117 366 4800	<b>Llys Sirol Caerlŷr</b> 90 Wellington Street Caerlŷr Swydd Gaerlŷr Lloegr LE1 6HG 0116 222 5700
<b>Birmingham Family Courts</b> Priory Courts 33 Bull Street Birmingham West Midlands Lloegr B4 6DS 0300 123 1751	<b>Canolfan y Llyosedd Sifil</b> <b>Caerdydd</b> 2 Stryd y Parc Caerdydd De Cymru Cymru CF10 1ET 029 20376400	<b>Luton County Court</b> 2nd Floor Cresta House Alma Street Luton Swydd Bedford Lloegr LU1 2PU 0844 892 0550
<b>Blackburn County Court</b> 64 Victoria Street Blackburn Swydd Gaerhiryfryn Lloegr BB1 6DJ 01254 299840	<b>Derby Combined Court</b> Morledge Derby Swydd Derby Lloegr DE1 2XE 01332 622600	<b>Manchester County Court</b> Bridge Street West Manceinion Manceinion Fwyaf Lloegr M60 9DJ 0161 240 5000
<b>Bradford Combined Court</b> Bradford Law Courts Exchange Square Drake Street Bradford Gorllewin Swydd Efrog Lloegr BD1 1JA 01274 840274	<b>Leeds Combined Court</b> The Court House 1 Oxford Row Leeds Gorllewin Swydd Efrog Lloegr LS1 3BG 0113 306 2800	<b>Middlesbrough County Court</b> <b>at Teeside Combined Court</b> The Law Courts Russell Street Middlesbrough Cleveland Lloegr TS1 2AE 01642 340000

Newcastle-upon-Tyne  
Combined Court Centre  
The Quayside  
Newcastle-upon-Tyne  
Tyne & Wear  
Lloegr  
NE1 3LA  
0191 201 2000

---

Romford County Court  
2a Oaklands Avenue  
Romford  
Essex  
Lloegr  
RM1 4DP  
01708 775353

---

Willesden County Court  
9 Acton Lane  
Harlesden  
Llundain  
Lloegr  
NW10 8SB  
020 8963 8200

---